

0 10 20 30 40 50 60 70 80 90 100 110 120 130 140 150 160

Inches  
Centimetres

傳 676.37  
862.2

Kodak Color Control Patches

1 2 3 4 5 6 7 8 9 10 11 12 13 14 15 16 17 18 19 20 21 22 23 24 25 26 27 28 29 30 31



18  
60  
7637



吳梅邨先生年譜



光緒三年丁  
丑八月重鐫

序

昔人謂少陵之詩詩史也讀其詩而天寶以後興亡治  
亂之蹟具在其爲史之所同者可以相證明焉其爲史  
之所遺者可以相參考焉詩之所以貴有爲而作也雖  
然少陵之集編體不編年讀其詩而不得其旨更求其  
年譜讀之而其詩之與新舊兩書相出入者乃條分件  
繫粲然而無所疑甚矣年譜之有功於詩也我鄉梅村  
先生之詩亦世之所謂詩史也先生負曠世之才爲風  
雅總持其所交游多魁奇俊偉之士而又當明季百六



之運故其集中之作類皆感慨時事悲譎掩抑銅駝石馬故宮禾黍之痛徃徃而在惟其詩編體而不編年當時有爲之作讀者或恨其不能盡詳孟子曰誦其詩讀其書不知其人可乎是以論其世也然則非年譜不足以知先生之詩之世非論先生之詩之世不足以知先生之詩之果爲詩史也先生之集有集覽有箋註而年譜闕如同里顧雪堂茂才劬學好古篤嗜先生之詩暇日求里中前輩程迓亭先生所箋編年之本爲年譜一書而又徧考其家牒雜識以附益之積數年之力成書

如千卷雪堂以同里後進爲先生編年之譜其蒐采尙易爲力故其書之贍洽視前人之編杜詩者有加焉蓋其體之詳畧各有所由來而要其用心之勤爲功於前人之詩以靳致其知人論世之意未嘗不一致也書旣成深佩雪堂之篤雅好事能補前人之所未逮遂不辭而爲之序

道光二十四年歲次甲辰同里徐元潤書



序

詩有年譜由來尙矣昔賢謂少陵詩爲詩史宋曾嘗撰  
註冠以年譜今注佚而譜存紹興中趙子櫟亦著杜詩  
年譜一卷不逮魯譜之密蘇長公集多諷切時事亦詩  
史也施元之蘇詩註家綿津中丞棐校復訂正王宗稷  
東坡年譜列於前使人開卷瞭如然則年譜與詩非相  
爲表裏歟婁東吳梅村祭酒詩風骨道上感均頑豔黎  
城靳氏集覽最爲詳洽吾鄉吳枚菴叟增刪之爲箋註  
巖少峯太守梓而行之亦以未見年譜爲憾祗錄陳顧



兩公撰墓誌行狀謂畧見一斑僕屢欲搜輯成編而未  
之逮比來司鐸太倉顧君雪堂示所著先生年譜四卷  
出入蘄吳兩註兼据迓亭程君編年未刊本次第纂攷  
具見苦心竝紀世系于前補脫簡于後尤爲無所闕遺  
喜其篤雅好古能蒐采鄉先生之往蹟雖爲功較易而  
用心較勤其分卷亦較倍益以見祭酒之爲詩史直可  
追杜蘇而後先頡頏焉適嚴迪甫觀察遠宦隴西將郵  
致是譜附吳君箋註本爲合璧余旣樂雪堂乃祭酒之  
功臣尤望迪甫爲前人克紹箕裘也書此以報雪堂并

寄觀察以代簡

道光乙巳夏日元和朱清壽芥榴識



吳梅村先生世系

里人顧師軾景和氏纂

先生姓吳氏諱偉業字駿公晚號梅村江南太

倉州人

七世祖子才名無考河南人元末避兵始遷蘇州

崑山之積善鄉配費氏

六世祖埕字公式以字行明正統元年贈承德郎

行在刑部雲南司主事配陳氏封太安人

攷又字式周

五世祖凱字相虞號冰蘂卒祀鄉賢祠配沈氏繼



沈氏再繼陳氏

蘇州府志吳凱字相虞父公式早亡遺腹生凱  
能力學養母里胥嘗召之役詣縣自陳有母不  
能遠離竊有志於學縣令芮翀異其言立遣就  
學後充貢京師中順天鄉試宣德中授刑部主  
事改行在雲南司再改禮部主客司以母老乞  
歸遂不復仕凱精敏有治劇才平生以禮自律  
言行不苟風儀嚴峻人望而畏之家居四十年  
非公事不至公府葉盛尤重之嘗曰鄉里作官

前輩當法吳丈後輩當法孫蘊章及卒鄉人私

諡貞孝先生

蘊章名瓊

葉文莊公

盛

相虞公墓誌銘祖才父式周母陳

氏公在姪而父亡既生公家復被畜母年尙少  
甘貧守約育而教之公晚得子而連得三子卒  
成化七年七月十四日壽八十有五配沈氏先  
卒子三人長恩輸粟於官授承事郎次惠次愈  
女二人婿顧恂龔綬銘曰孰完五福惟善日不  
足孰永終譽名不必公與卿吁嗟乎公後有考



於茲銘

恂先文康公鼎臣父

高祖愈字惟謙號遜菴配夏氏

蘇州府志吳愈字惟謙凱子成化乙未進士授南京刑部主事歷員外郎中初凱起家刑曹每爲愈言折獄之道愈在部繙閱舊牘遂精法律一時奏讞咸倚以決出知敘州府慶符盜劫縣治合捕得二十七人已誣服愈疑之乃詣縣辨審釋二十五人未幾果獲真盜土官安鰲以馬湖叛衆議用兵愈策曰鰲無遠謀然其甲兵精利未易敵也彼中無水當重圍以困之議未決而鰲忽棄城走衆慮其糾諸夷爲亂愈曰彼以郡守將兵接戰勝負未可知既離巢穴一窮寇耳諸夷皆其仇又何能爲因遣人襲之不血刃而獲自是馬湖改置流官後其黨復劫府印爲亂愈親抵其巢諭之遂獻印解散在敘九年遷河南參政致仕歸卒年八十四

王弇州

世貞

吳遜菴贊在郡九年課農桑興學

校戶口滋殖風俗醇美爲諸郡最而業已倦游



矣里居優游自奉養喜賓客和謹得後進心有  
女三人歸陸伸文徵明皆名士而歸王氏者有  
子同祖以才入中秘皆侍公周旋以是寬樂於  
其身贊曰仕不九卿曰上大夫壽不九秩曰八  
十餘宅相所貽蘭蕤玉枝父子耆喆爲鄉閭師  
先文康公鼎臣吳公惟謙墓表卒於嘉靖丙戌  
五月十九日年八十四子男四長東浦江縣縣  
丞次南國子生公仲第憲無嗣推以爲後次西  
次守中國子生孫男詩訪許誌

嗣高祖憲字維明號靜菴配陳氏無子以愈次子  
南爲嗣

曾祖南字明方號方塘賜內閣中書後官鴻臚寺  
序班以使事過家爲御史所論謫江西建昌府幕  
官配鄭氏繼袁氏

先生先伯祖玉田公墓表余家世鹿城人自禮  
部公以下大參鴻臚三世皆葬於鹿城公爲鴻  
臚長子次卽贈嘉議大夫少詹事諱議余祖也  
又次則諱誥偉業四五歲曾見及之老且貧衣



食於卜肆余祖嘗抱偉業於滕顧叔祖而嘆曰  
爾知我宗之所以衰乎三世仕宦廉吏之橐固  
足以傳子孫爾伯祖實主其帑用之爲飲食裘  
馬費產遂中落余與爾叔祖庶出也少孤故皆  
貧余祖亡後祖母湯孺人每談及鴻臚公時事  
輒言嘉隆中鹿城倭難伯祖自以私財募兵千  
餘人轉戰湖泖間兵敗左右皆沒得一健卒負  
之免家遂以破

祖議字子禮號竹臺以先生貴贈嘉議大夫詹事  
府少詹事幼贅於瑯琊王氏遂居太倉副室湯氏  
封太淑人

先生秦母于太夫人七十壽序衰門貧約吾母  
操作勤苦以營舅姑滌滌之養湯淑人憐其多  
子代爲鞠育余自少多病由衣服飲食保抱提  
攜惟祖母之力是賴憶自早歲通籍祖母年七  
十有三及以南都恩賜封三世湯淑人期屆九  
秩笄珈白首視聽不衰里人至今以爲太息

父琨字禹玉又字蘊玉號約齋又號約叟諸生以



經行稱鄉里先生貴封嘉議大夫詹事府少詹事  
國朝舉鄉飲大賓卒祀鄉賢祠配陸氏繼朱氏  
封淑人

鈕琇

觚賸江右李太虛爲諸生時嗜酒落拓而

家甚貧太倉王岵雲司馬備兵九江校士列郡  
拔太虛第一引見之謂曰吾固多子擇師無若  
子者願遠在婁東子能一往乎李許諾次日卽  
遣使送至其家時王氏一長子已受業同里吳  
蘊玉先生蘊玉者梅村先生父也而太虛教其

第四五諸郎兩人共晨夕甚歡梅村甫齠齡亦  
隨課王氏塾中李奇其文卜爲異日偉器歲將  
闌主家設具讌兩師出所藏玉卮侑酒李醉揮  
而碎之王氏子面加譙讓李亦盛氣不相下席  
罷後謂吳曰我安可復畱此遂拂衣去吳知其  
不能行也翼日早起追於城闔出館俸十金爲  
贈乃附賈舶歸然所贈貲大半耗於酒及抵家  
垂橐蕭然亟呼婦治具婦曰吾絕糧已久安所  
得粟憶君去後猶存故人酒一罌請佐君軟飽



可乎婦往鄰家覓薪李卽發罌罌內產一芝如  
盤紫光煜煜喜且愕曰此瑞徵也願酒敗不可  
飲奈何挹之則清冽異常乃浮白獨斟婦負薪  
歸則罌已罄矣是秋登鄉薦明年成進士入詞  
館數載後以典試復命過吳門王氏子謁於舟  
次李急詢吳先生近狀是時梅村亦登賢書因  
購吳行卷攜以北上爲延譽京師辛未梅村遂  
爲太虛所薦登南宮第一及第第二人年僅弱  
冠蘊玉先生享榮養者三十年可爲疎財敦友  
之報而岫雲諸子自司馬沒後家漸替矣

先生于太夫人壽序吾母朱淑人精心事佛嘗  
于鄧尉山中創構傑閣虔奉一大藏教

嗣祖諫字子猷號玉田官福安縣縣丞葬梅灣配

某氏繼查氏再繼陸氏子一查氏出天

本宛平王  
敬哉崇簡

青箱堂集吳母張太孺人  
墓誌銘詳後順治丙申年

先生玉田公墓表於吳門遇三山鄭君曰余姻  
也詢之則三山之兄曰某者爲伯祖媾余姑尙  
在也偉業乃具禮幣拜見則年已七十三泫然



泣曰猶憶會鴻臚公葬時曾到鹿城見二叔今  
已六十年不通家問二叔謂吾祖也歸而告我  
祖母湯孺人孺人泣吾世父與吾父知之亦泣  
泣年六十始知有伯姊也相率至梅灣墓下再  
拜哭且加封樹焉吾姑後三年以卒有二子以  
其一從吳姓主梅灣之祭

嗣父瑗字文玉號蘧菴禮部冠帶儒士配王氏繼

張氏

本青箱堂集詳  
後順治丙申年

吳梅村先生世系

吳梅村先生年譜卷一

里人顧師軾景和氏編

里人顧思義仁仲氏訂

故明萬曆三十七年己酉五月二十日先生生

母朱太淑人姪先生時夢朱衣人送鄧以讚會元

坊至遂生先生

三十八年庚戌二歲

三十九年辛亥三歲

四十年壬子四歲



熊學院科試先生尊人約齋公補博士弟子員

四十一年癸丑五歲

仲弟 偉節 生

四十二年甲寅六歲

四十三年乙卯七歲

讀書江公

用世

家塾

先生按察司使江公墓誌

銘始余年七歲讀書公家塾識公公卽是年領

鄉薦後三十年家居公折輩行與余及魯岡游

八月祖竹臺公卒

四十四年丙辰八歲

四十五年丁巳九歲

四十六年戊午十歲

四十七年己未十一歲

就穆苑先

雲桂

家中讀書

先生穆苑先墓誌銘

自余生十一始識君居同巷學同師出必偕宴

必共如是者五十年君爲先大夫執經弟子余

兄弟三人君所以爲之者無有不盡余雖交滿

天下其相知莫如君余之初就君齋讀書也有



同時游處者四人志衍純祐爲兄弟魯岡與之  
共事其輩行差少皆吳氏余宗也鄰舍生孫合  
修亦與焉

季弟偉光生

四十八年庚申

是年八月後  
改元泰昌

十二歲

天啟元年辛酉十三歲

二年壬戌十四歲

隨父約齋公讀書志衍

繼善

家之五桂樓

先生

志衍傳余年十四識志衍志衍長於余二歲兩

人深相得哭志衍詩余始年十四與君蚤同學

蚤起詩惜爽憇南樓送志衍入蜀詩我昔讀書

君南樓程

穆衡

箋先生幼隨父約齋公讀書志

衍家之五桂樓詩中所咏南樓是也

能屬文西銘張公

溥

見而嘆曰文章正印在此子

矣因畱受業於門相率爲通今博古之學

程

穆

衡

婁東耆舊傳江右李太虛明睿落魄客授州

王大司馬所與公父善見公於髫髻奇之一日

飲於王氏太虛被酒碎其玉卮主有詬言憤怒



去約叟退而贖之太虛曰君子奇才也天如將  
以古學興東南盍令從遊乎約叟如其言

三年癸亥十五歲

四年甲子十六歲

西銘肇舉復社先生爲入室弟子

楊夔復社事

實文社始於天啟甲子合吳郡金沙橋李僅十

有一人張溥天如張采來章楊廷樞維斗楊夔

子常顧夢麟麟士朱隗雲子王啟榮惠常周銓

簡臣周鍾介生吳昌時來之錢旃彥林分主五

經文字之選而效奔走以襄厥事者嘉興府學

生孫淳孟樸也是曰應社當其始取友尙隘來

之彥林謀推大之訖於四海於是有廣應社貴

池劉城伯宗吳應箕次尾涇縣萬應隆道吉蕪

湖沈士柱崑銅宣城沈壽民眉生成來會聲氣

之孚先自應社始也

五年乙丑十七歲

六年丙寅十八歲

七年丁卯十九歲



崇禎元年戊辰二十歲

陳學院歲試入州庠

二年己巳二十一歲

西銘與同里張南郭

采

舉復社成先生名重復社

復社事實崇禎之初嘉魚熊開元宰吳江進諸

生而講藝於時孫淳孟樸結吳翮扶九吳允夏

去盈沈應瑞聖符等肇舉復社於時雲間有幾

社浙西有聞社江北有南社江西有則社又有

歷亭席社崑山雲簪社而吳門別有羽朋社匡

社武陵有讀書社山左有大社僉會於吳統合

於復社復社始於戊辰成於己巳其盟書曰學

不殖將落毋蹈匪彝毋讀匪聖書毋違老成人

毋矜己長毋形彼短毋以辨言亂政毋干進喪

乃身嗣今以往犯者小用諫大者擯僉曰諾是

役也孟樸渡淮泗歷齊魯以達於京師賢士大

夫必審擇而定矜契然後進之於社故天如之

言曰忘其身惟取友是急義不辭難而千里必

應三年之間若無孟樸則其道幾廢蓋先後大



會者三復社之名動朝野孟樸勞居多然而歛

怨深矣先生有致雲間同社諸子書致孚社諸子書

西銘爲尹山大會陸世儀復社紀畧吳江合楚

人熊魚山以文章經術爲治慕天如名迎致邑

館於是爲尹山大會茗雪之間名彥畢集遠自

楚之蘄黃豫之梁宋上江之宣城寧國浙東之

山陰四明輪蹄日至比年而後秦晉閩廣多有

以文郵置者

三年庚午二十二歲

李學院科試一等三名補廩膳生員

舉鄉試十二名座主庶子姜曰廣江西新建人萬

曆己未進士編修陳演四川井研人天啟壬戌進

士春秋房房師鎮江府推官周廷鑑福建晉江人

天啟乙丑進士按先生有寄房師周芮公先生詩

西銘爲金陵大會復社紀畧崇禎庚午諸賓興

者咸集天如又爲金陵大會是科主裁爲江西

姜居之曰廣榜發解元楊廷樞而張溥吳偉業

皆魁選



四年辛未二十三歲

舉會試第一名座主內閣周

廷儒

宜興人內閣何

如寵

桐城人房師李

明睿

江西南昌人天啟壬戌

進士

按先生有閩園詩座主李太虛師從燕都間道北歸尋以南昌兵變避亂廣陵賦呈八首

諸詩

思義

李少司馬

繼貞

萍槎年譜辛未會試同考

得士二十有一人是年榜元爲吳偉業世通家

也填榜止餘第二第一尙有推敲首揆周諱延

儒偶思吳卷爲太倉人係余同里因招余首問

家世以及年貌文望余一一答之甚悉且云行

文直似王文肅公首揆喜大聲徧語同考更首

肯文肅公一語於是遂定吳卷爲第一余因筆

記云憶吳之祖竹臺公與先君子爲筆硯交白

首相歡其父禹玉受業於余余子又受業於禹

玉蓋三世通家矣今日闈中推轂之語雖捧土

增山要亦添花著錦余豈貪天功以爲己私耶

李

繼貞

與門人吳禹玉書去秋得鹿鳴報爲

之起舞今春在闈中親見填榜得令郎首冠多



士益喜躍不自禁兩相國知不佞同里卽詢家  
世來歷一一置對兩相國亦自喜慰無量思令  
先尊與家大夫筆硯一生不得鄉校乃不佞三  
入闈得賭桃李之盛而令嗣一飛冲天又不似  
鄙薄苟然而已此豈非造物之嗇前豐後亦爲  
善者之必有餘慶與門下自此可收邵書本打  
帳做大封君若復戀戀雞肋恐作第二人將不  
免爲令郎所笑善刀藏之何如

殿試一甲第二名授翰林院編修 復社紀畧是

科延儒欲收羅名宿密囑諸分房於呈卷之前  
取中式封號竊相窺伺明睿頭卷卽偉業也延  
儒喜其爲禹玉之子明睿亦知爲舊交之子偉  
業由此得冠多士烏程之黨薛國觀洩其事於  
朝御史袁鯨將具疏參論延儒因以會元卷進  
呈御覽莊烈帝批其卷曰正大博雅足式詭靡  
而後人言始息

先生入翰林制詞曰陸機詞賦早年獨冠江東  
蘇軾文章一日喧傳都下當時以爲無愧



疏劾蔡奕琛

奕琛

復社紀畧溥緝烏程通內結黨援

引同鄉諸子繕疏授偉業參之偉業立朝未久  
於朝局未練不之應時溫之主持門戶操握線  
索者德清蔡奕琛爲最偉業難拒師命乃取參  
體仁疏增損之改坐奕琛

假歸娶郁淑人

淑人萬曆庚子武舉季茂女

陳繼儒

送吳榜

眼奉旨歸娶詩年少朱衣馬上郎春闈第一姓  
名香泥金帖貯黃金屋種玉人歸白玉堂北面  
謝恩纔合香東方待曉漸催粧詞臣何以酬明

主願進關睢窈窕章

張溥

送吳駿公歸娶詩

孝弟相成靜亦娛遭逢偶爾未懸殊人間好事  
皆歸子日下清名不愧儒富貴無忘家室始聖  
賢可學友朋須行時襍被猶衣錦偏避金銀似  
我愚

程

穆衡

先生詩箋單狷菴

恂

竹香菴集

吳太史奉詔歸娶眉公屬諸子同賦二律狷菴  
警句云鏡邊玉筍人初立屏底金蓮燭乍移又  
云梅粧并倩仙郎畫元是春風第一花 先行  
人

陳埈

抱桐集祭酒恆言吾一生快意無過三



聲臚唱占雲宮袍曜日帶醒初上奏節夏然錦  
書御輪綺宵卻扇流蘇初下放鉤鏗然海果生  
遲石麟夢遠珠胎初脫墮地呱然

河決金龍口滕縣沈焉有悲滕城詩

李學院歲試先生仲弟

偉節

入州庠

字清臣

五年壬申二十四歲

西銘假歸爲虎邱大會刊國表社集行世 復社

紀畧偉業以溥門人聯捷會元鼎甲欽賜歸娶  
天下榮之遠近謂士子出天如門下者必速售

比溥告假歸途中艤首所至挾策者無虛日及  
抵里四遠學徒羣集癸酉春溥約社長爲虎邱  
大會先期傳單四出至日山左江右晉楚閩浙  
以舟車至者數千餘人大雄寶殿不能容生公  
臺千人石鱗次布席皆滿往來絲織游人聚觀  
無不詫嘆以爲三百年來未嘗有也

按復社紀畧總綱壬

申張溥給假葬親歸爲虎邱大會

六年癸酉二十五歲

約齋公五十初度

張溥

有吳年伯母湯太夫人



壽序 載西銘集

七年甲戌二十六歲

城隍廟正殿災有重修太倉州城隍廟碑記

八年乙亥二十七歲

入都補原官充實錄纂修官 李 繼貞 送吳文玉

入京師太史駿公所詩長安名利地君行獨無

求隨身一敝篋附舟若輕鷗累心既云盡別家

了不愁惟念太史公京洛多貴游名高眾所集

道廣慮難周君到雖坐鎮時復佐老謀切劇公

輔器伋俟協金甌當思伯氏庸割俸營菟裘勿

謂余戲言三公今黑頭

倪學院歲試季弟 偉光 入州庠 字孚令

九年丙子二十八歲

奸民陸 文聲 訐復社事 太倉州志時有奸民首

告復社事當軸陰主之欲盡傾東南名士偉業

疏論無少避 明史張溥傳里人陸文聲者輸

資為監生求入社不許采又嘗以事扶之文聲

詣闕言溥采為主盟倡復社亂天下温體仁方



柄國嚴旨窮究不已至十四年溥已卒而事猶未竟刑部尙書蔡奕琛坐黨薛國觀繫獄未知溥卒也許溥遙握朝權已罪由溥因言采結黨亂政詔責溥采同奏當是時體仁已前罷繼相者張至發薛國觀皆不喜東林及是至發國觀亦相繼罷而周延儒當國溥座主也其獲再相溥有力焉故采疏上事卽得解復社紀畧陸文聲字居實以事銜張采攜其事走京師蔡奕琛導之温體仁所温意中不知有采先是體仁欲罷行取啟上因星變青衣布袍齊居武英殿求直言令淮安衛三科武舉陳啟新上書特旨擢列諫垣至是乃曰誰爲張采合所急者張溥耳能併彈治當授官如啟新矣文聲從之事下學臣倪元琪時社中吳繼善克孝夏允彝陳子龍皆在京謂文聲必有浙人頤指說之就選出諸外社局始安乃釀金爲部費使擇善地文聲與二吳有表戚克孝爲盟約以堅之得道州吏目以去元琪竟以隱降調繼之山東元璋瑋艱



歸齊人張鳳翮代之延臨川羅萬藻閱文學政

悉入羅掌握温無如之何會明年溥卒温罷相

事得解 復社事實十年正月蘇州民

明史作  
太倉州

監生陸文聲疏陳風俗之弊皆原於士子庶吉

士張溥知臨川縣事張采倡立復社以亂天下

思陵下提學御史倪元珙察覈倪公言諸生誦

法孔子引其徒談經講學互相切劘文必先正

品必賢良實非樹黨文聲以私憾妄訐宜罪閣

臣以公蒙節降光祿寺錄事蘇州推官周之夔

者與溥同年舉進士初亦入社至是希閣臣意

墨經詣闕復訐奏溥等樹黨挾持案久未結讒

言罔極至有草檄以伸復社十罪者大約謂派

出婁東吳下雲間學則天如維斗臥子上搖國

柄下亂羣情行殊八俊三君迹近八關五鬼外

乎黨者雖房杜不足言事業異吾盟者雖屈宋

不足言文章或呼學究知囊或號行舟太保傳

檄則星馳電發宴會則酒池肉林至十五年御

史金毓峒給事姜琛各上疏白其事始奉旨朝



廷不以語言文字罪人復社一案准註銷後福藩稱制阮大鍼怨戊寅秋南國諸生顧杲等一百四十八之具防亂公揭也日思報復爰有王實鼎東南利孔久湮復社巨魁聚斂一疏大鍼語馬士英云孔門弟子三千而維斗等聚徒至萬不反何待至欲陳兵於江以爲防禦心知無是事而意在盡殺復社之主盟者時崑銅暨宜興貞慧定生輩皆就逮繫獄桐城錢秉鐙宣城沈壽民亡命得脫假令王師下江南少緩則

復社諸君子難乎免於白馬之禍矣 朱彝尊

靜志居詩話復社雖太倉二張主之實引次尾扶九相助當其時烏程温相君有子求入社扶九堅持不可於是徐懷丹之檄陸文聲之疏周之夔之彈事又繼以王實鼎之飛章而復社禍機既發扶九亦日在憂患中

秋典湖廣試刑科給事中宋 致 爲副與熊魚山 開  
元 鄭淡石 友元 會 先生書宋九青逸事九青以刑右給事副余使楚兩人相得甚蓋其時天下



已多事楚日岌岌而武昌阻大江固無恙楚之  
賢士大夫爲魚山熊公淡石鄭公乃九青同年  
生又皆吏於吾土聞兩人之至也拏舟來酌酒  
江樓敘述往昔商校文史夜半耳熱談天下事  
流涕縱橫 先生宋玉叔詩文集序守官京師  
從九青游奉使同事楚闈登黃鶴樓俛眺荆江  
鄂渚間拊楹慷慨九青題咏甚夥余愧未能成  
章亦勉賡以紀名勝九青不鄙而進余謂可深  
造於斯事 先生梅村詩話九青年十九登乙  
丑進士任吏科給事陞太常進戶部侍郎以枚  
卜遇譴歸嘗與余同使楚竟陵鄭淡石贈什曰  
剖斗折衡爲文章天下婁東與萊陽謂吾兩人  
也 張溥跋宋九青送熊魚山文手卷熊魚山  
鄭淡石兩先生之爲諫官也一以三月去一以  
十月去顧其令吾吳則皆六年也蘇松財賦甲  
天下吳江華亭殷大尤冠二郡兩先生以德填  
之六年之內無逋賦無罷人百姓稱爲至平迺  
天子再命大吏稽錢穀時淡石行矣文書往來



高下者久之獨兩先生調他職徵其說則曰以  
賦故也都人士目睽睽益不知所謂嗟乎苟不  
得所謂讀兩先生封事可矣苟不及讀兩先生  
封事讀宋九青一篇送行文其亦可矣

夜泊漢口 送黃子羽之任

十年丁丑二十九歲

充東宮講讀官

陳子龍

贈吳太史充東宮講官

詩蒼葢開震域青殿接文昌霞氣騰元圃瓊條  
拂畫堂選端周典禮拜傅漢元良史職移仙省

宮僚總帝鄉金貞儲后重玉立侍臣莊羽籥傳  
秋實詩書出尙方夏侯經術茂皇甫素懷芳雜  
戟青槐蔭龍泉碧藻香珠簾參晚燕璧月照春  
坊下賦情文稱王箴忠愛長一時推碩德萬國  
仰重光媿我羊裘側思君象輅旁臨風疏館靜  
遙夕可相望

劾張

至發

直聲動朝右

明史萬歷中申時行王

錫爵先後枋政大旨相紹述謂之傳衣鉢張至  
發代溫體仁一切守其所爲而才智機變遜之



嘗簡東宮講官擯黃道周為給事中馮元飈所刺至發兩疏詆道周而極頌美温體仁孤執不欺為編修吳偉業所劾

七月次女生後適海甯陳直方 容永相國之遜子

先生遣悶詩一女血淚啼闌干舅姑嶺表無書

傳一女家破歸間關良人在北愁戍邊更有一

女憂風煙圍城六月江風寒 按先生長女適王天植陳生增城合

瑞國子又有女適桐城何某贛州守應璜子又考婁東耆舊傳張塤娶梅村吳公第六女塤宿遷訓導蒿園之子給諫王治之孫

又按先生行狀及墓表女九人郁淑人出四側室浦孺人出三側室朱安人出二攷延陵家譜一適諸生王陳立增城合瑞國子一適海甯孝廉陳容永相國之遜子一適江甯監生何棠贛州守應璜子一適胡金門一字宜興諸生周申祺未嫁卒郁淑人出一適吳縣錢鏡徵一適崑山監生李昶側室浦氏出一適監生張塤一適常熟國子監助教封翰林院庶吉士席永恂側室朱安人出

吳梅村先生年譜卷一終



吳梅村先生年譜卷二

十一年戊寅三十歲

江右楊機部

廷麟

以翰林改官兵部主事贊畫督

臣盧

象昇

軍事

與楊鳧岫

士聰

謀劾吏部尙書田

惟嘉

太僕寺卿

史

堃

諸不法事

先生左諭德濟甯楊公墓誌銘

丁丑會試同考得春秋士二十三人明年皇太

子出閣講學充校書官以職事糾中書黃應恩

失當事意尋以經筵講官召對面論考選得失



疏劾吏部尚書田惟嘉及其鄉人史莖所爲諸  
不法上用其語惟嘉黜免莖逮問未幾田史之  
黨復振公病請回籍辛巳史莖死獄中詔籍其  
家應恩前已他事論死乃思公言爲可用 又  
公謹質凝重大節其以職事糾黃應恩也應  
恩者小人歷事久關通中外舊制詞臣於殿閣  
大學士爲同官而中書特從史卽積資至九卿  
不得鈞禮淄川相以外臣入廢掌故而應恩挾  
中官重示籠絡又助爲調旨以此得相張心益  
驕無舊節公與語不合立具奏又移書淄川責  
數之而僉人盡曰懾公矣田惟嘉者以吏侍郎  
取中旨進於相張爲師生而史莖特虎而鷲父  
喪家居頤指諸大吏爲威福天下莫敢言公於  
便殿白發其端退而上書條疏贓釁章十數上  
三月二十四日召對進端本澄源之論

湯太淑人八十稱觴

李繼貞有吳母湯太夫人

八十壽文

載萍  
槎集

十二年己卯三十一歲



升南京國子監司業 李繼貞與門人吳禹玉書

令長公南司成之推大爲扼腕要之饒山水多  
高賢宜詩酒有此三快三公不易矣今已抵任  
否門下奉親之暇何以爲適園林窮勝事鐘鼓  
樂清時此二語可以當之

督師盧象昇卒 先生詩話盧自謂必死願參軍

書生徒共死無益乃以計檄之去機部不知也  
機部到孫侍郎傳廷軍前六日盧公於賈莊死  
難矣 明史盧象昇傳楊廷麟上疏嗣昌怒奪

象昇尙書巡撫張其平閉闔絕餉俄又以雲晉  
警趣出關王朴徑引兵去象昇提殘卒次宿南  
宮野外畿南三郡父老聞之咸叩軍門泣請移  
軍廣順無隻臂之援立而就死象昇流涕謝以  
事從中制食盡力窮旦夕死矣無徒累爾父老  
爲衆號泣各攜斗酒粟餉軍十二月十一日進  
師至鉅鹿賈莊起潛擁關甯兵在雞澤距賈莊  
五十里而近象昇遣廷麟往乞援不應師至蒿  
水橋遇 大清兵象昇將中軍大威帥左國



柱帥右遂戰夜半鬻策聲四起旦日騎數萬環  
之三匝象鼻麾兵疾戰呼聲動天自辰至未礮  
盡矢窮奮身鬪殺後騎皆進手擊殺數十人身  
中四矢三刃遂仆掌牧楊陸凱懼衆之殘其屍  
而伏其上背負二十四矢以死一軍盡覆大威  
國柱潰圍得脫 明史楊廷麟傳十一年冬京  
師戒嚴廷麟上疏劾兵部尙書楊嗣昌言大臣  
以國爲戲嗣昌與高起潛方一藻倡和欵議武  
備頓忘督臣盧象昇以禍國責樞臣言之痛心  
夫南仲在內李綱無功潛善秉成宗澤隕命乞  
陛下赫然一怒明正向者主和之罪俾將士畏  
法無有二心嗣昌大恚詭薦廷麟知兵改兵部  
職方司主事贊畫象昇軍 思義 虞山蒙叟詩  
攷 孤臂云何堪兩胸只墮西事不成東又不能曲  
突到焦頭五月邊書九月售薊督方一藻督監  
高起潛本兵楊嗣昌共謀輸平以緩國難五月  
通事人周元忠致信云欵若不成夏秋必有舉  
動十一年九月 大清兵入牆子嶺殺總督



吳阿衡毀正關至營城石匣駐於牛蘭召宣大  
山西三總兵楊國柱王朴虎大威入衛三賜象  
昇尙方劍督天下兵楊嗣昌高起潛主和議象  
昇聞之頓足嘆帝召問方畧象昇對曰臣主戰  
帝色變良久曰撫乃外廷議耳其出與嗣昌起  
潛議議不合事多爲嗣昌起潛撓疏請分兵則  
議宣大山西三帥屬象昇關甯諸路屬起潛象  
昇名督天下兵實不及三萬

漳浦黃公

道周

論楊

嗣昌

奪情事受廷杖先生遣

太學生涂

仲吉

入都訟寃干上怒嚴旨責問主使

先生幾不免

奉使封延津孟津兩王於禹州

過汴梁登梁孝王臺

漳浦黃公南還先生與馮

司馬

遇之唐樓舟中出所註易授先生

思義

攷 楊奪情爲大司馬已大拜至戊寅冬寇變

衆懼不免而聖眷彌篤已卯暫削官階冠帶辦  
事隨即賜復九月督師盪寇錫宴後殿賜御製  
詩以寵其行詩曰鹽梅今借作干城大將威嚴  
細柳營一掃寇氛從此靖還來教養遂民生李



少司馬雜錄云看此詩氣象蕩平有機若使功  
成報命便與裴晉公何異惜乎虛此盛典也虞  
山蒙叟投筆集註云閣臣楊嗣昌素奉佛法既  
出視師專意招降賊降者數十萬卽於附近安  
插未幾降者復反四面皆起王師如在重圍中  
矣嗣昌每日持誦華嚴謂此經可以消劫

十三年庚辰三十二歲

升中允諭德

嗣父文玉公卒

陳廷敬

先生墓表升中允諭德

丁嗣父艱服除會南中立君登朝一月歸

臨江參軍 先生詩話機部自盧公死後其策

益不用無聊生詔詰督師死狀賈莊前數日

督師誓必戰顧孤軍無援聞太監高起潛

史云

陳起潛

兵在近則大喜於真定野廟中倚土銜

作書約之合軍高竟拔營夜遯督師用無援

故敗機部受詔直以實對慈谿馮鄴仙得其

書謂余曰此疏入機部死矣爲定數語機部

聞之則大恨先是嗣昌遣部役張姓者

史云俞振



龍 偵賈莊而其人譚盧公死狀流涕動色嗣

昌榜笞之楚毒備至口無改辭曰死則死耳

盧督師忠臣吾儕小人敢欺天平遂以拷死

於是機部貽書馮與余曰高監一段竟為刪

却後世謂伯祥不及一部役耶然機部竟以

此得免已而過宜興訪盧公子孫再放舟婁

中與天如師及余會飲十日嘉定程孟陽為

畫髯參軍圖余得臨江參軍一章余與機部

相知最深於其為參軍周旋最久故於詩最

真論其事最當即謂之詩史可勿愧機部後

守贛州從城上投濠死機部隆武朝進兵部  
尚書東閣大學士開

府南贛丙戌十  
月初四日死難

十四年辛巳三十三歲

李自成 陷河南福王常洵 遇害有汴梁二首

五月哭張西銘師

再訐復社命下南郭獨條對上獄乃解 張采 具

陳復社本末疏載金鴻  
縣志

靜志居詩話崇禎戊寅南國諸生顧杲等百四



十人具防亂公揭請逐閹黨阮大鍼子方實居  
其首有云杲等讀聖人之書明討賊之義事出  
公論言與憤俱但知爲國除姦不惜以身賈禍  
大鍼飲恨刺骨而東林復社之讎在必報矣大  
鍼名在東林黜將錄號沒遮攔而閩人周之夔  
亦注名復社第一集阮露刃以殺東林周反戈  
以攻復社君子擇交不可不慎於始也

陳鼎東林列傳蠅蚋錄出於溫體仁蝗蝻錄出  
於阮大鍼又有續蠅蚋錄及蝗蝻錄乃復社諸

君子也計二千五百五十五人惟兩陝滇中無  
人

十五年壬午三十四歲

春

大清兵克松山洪

承疇

降遂下錦州祖

大

壽

以錦州降有松山哀

七月田貴妃薨葬天壽山有永和宮詞

十六年癸未三十五歲

升庶子

李

自成

破潼關督師孫

傳廷

戰死有雁門尙書行



文祖堯

來爲太倉州學正鼎革後棄官寓僧寺以青烏術自給人皆知滇南先生爲古君子有文先生六十壽序送文學博以蒼公招同住中峯寺曇陽觀訪文學博介石兼讀蒼雪詩遺跡有感諸詩志衍之成都任有送志衍入蜀詩

附

先生詩話卞玉京題扇送余兄志衍入蜀云

剪燭巴山別思遙送君蘭梅渡江皋願將一幅瀟湘種寄與春風問薛濤

秋七月

由崧

襲封福王

十二月文選司郎中吳

昌時

棄市

吳江縣志吳

昌時少受業於周忠毅宗建故與清流通聲氣而爲人墨而狡旣通籍日奔走權要探刺機密以炫鬻市重周延儒之再起也昌時爲通關節及爲首輔其辛未取士馬世奇本延儒師力勸以正故初治事頗有賢聲而昌時則挾勢弄權大啟倖門延儒視師通州一晨而昌時之啟事八至帝密刺之知其交關狀而未發吏部舉行年例先擇選事故事副郎有調部者正郎不調



部昌時欲持權使人誑冢宰鄭三後曰昌時持  
正有風力主年例爲宜遂從儀制正郎調文選  
事爲破格人皆側目及舉行年例出異已者十  
人於外一時大譁旣而御史蔣拱宸劾昌時贓  
私巨萬多連延儒并言內通中官漏洩禁密事  
帝震怒御中左門親鞫之遂下獄論死且始有  
誅延儒意時魏藻德新入閣有寵謂其師薛國  
觀之死昌時實致之恨昌時甚因與陳濟甚排  
延儒掌錦衣衛者駱養性復騰蜚語帝遂命盡  
削延儒職勒其自盡而昌時棄市論者謂一人  
無逃刑帝能申法也

雒陽行 先生詩話陳臥子嘗與余宿京邸謂  
余曰卿詩絕似李頎又誦余雒陽行一篇謂  
爲合作

大清順治元年甲申

明崇禎十七年

三十六歲

三月流寇陷京師莊烈帝崩於萬壽山先生里居  
聞信號痛欲自縊爲家人所覺朱太淑人抱持泣  
曰兒死其如老人何乃已 明史周遇吉傳十七



年二月太原陷遂陷忻州圍代州遇吉先在代  
遇其北犯乃憑城固守而潛出兵奮擊連數日  
殺賊無算會食盡援絕退保寧武賊亦踵至遇  
吉四面發大礮殺賊萬人設伏城內出弱卒誘  
賊入城殺數千人城圯復完者再傷其四驍將  
自成懼欲退其將曰我衆百倍於彼但用十攻  
一更番進蔑不勝矣城遂陷闔家盡死而大同  
總兵姜瓖表至自成大喜方宴其使者宣府總  
兵王承廕表亦至自成益喜遂決策長驅歷大

同宣府抵居庸太監杜之秩總兵唐通復開門

延之京師遂不守矣賊每語人曰他鎮復有周

總兵吾安得至此

楊士聰甲申核真畧賊之

陷二關而入也守寧武關者總兵周遇吉夫婦

臨陣殲賊無數賊誘降不從力盡全家赴火賊

屠其城嘆曰使守將盡如周將軍吾何以得至

此是日至宣府白廣恩官撫民與總兵姜瓖約

降至居庸太監杜之秩與唐通俱降 先生綏

寇紀畧自成初盜福邸之貨以號召宛雒逮乎



京師陷其下爭走金帛財物之府以分之彼飢  
寒乞活之人一旦見宮室帷帳珍怪重寶以千  
數志滿意得飲酒高會舐篋擔囊惟恐在後

山海關總兵吳

三桂

奉詔入援聞燕京陷猶豫不

進

自成

執其父

襄

合作書招之許以通候之貴

三

桂

欲降至灤州聞愛妾陳

沅

爲賊所掠大憤急歸

山海關乞降於我

大清有圓圓曲

詩中有衝冠一怒爲

紅顏句三桂賫重幣求去此詩先生弗許

四月鳳陽總督馬

士英

等迎福王

由崧

入南京稱

監國王寅自立於南京國號宏光

附唐孫華

東江集談金陵舊事詩金陵昔喪亂

炎運植標季忽從大梁城倉皇走一騎偶竊藩

邸璋自言某王嗣貴陽一奸人乘時思射利奇

貨此可居何暇論真僞卜者本王郎矯誣據神

器遂修代來功超踰登相位權門輦金帛掖庭

陳秘戲江表張黃旗王氣銷赤幟媿息僅一年

傳聞有二異北來黃犢車天表自英粹雜問聚

朝官瞠目各相視遙識講臣面備言宮壺事諸



臣媚新君誰肯辨儲貳爭效雋不疑競指成方

遂泉鳩無主人束縛乃就吏復有故宮妃飛蓬

亂雙髮自言喪亂時化離中道棄生子已勝衣

壯髮猶可識不望昭陽恩不望金屋貯願一見

大家瞑目甘入地上書欲自通沉沉九闕闕詔

付掖庭獄見者為垂淚不如厲王母銜憤早自

刺祗緣當璧假翻招故劍忌誠恐相見非泄此

蹤跡秘滅口計未忍對面諒餘愧鳥獸有伉儷

豺虎知乳孳豈獨非人情捐棄恩與義嬴呂及

牛馬秦晉潛改置皆從胎孕中長養崇非類未

聞妄男子潛盜出不意龍種乞為奴孤假得暫

恣茲實眾口傳曾見遺老記疑事終闕如庶聽

來者議福世子之偽正史不載錄之以廣異聞

分江北為四鎮以黃得功劉澤清劉良佐高傑領

之

史可法開府揚州按東華錄有攝政王遣南來副將韓拱薇等致明大學士史可

法書宏光甲申九月十五日史可法答攝政王書

五月



大清定鼎燕京

十月張獻忠破成都志衍一門三十六口俱被害

有志衍傳觀蜀鵲啼劇題志衍山水詩

姜採謫戍宣州衛有東萊行 明史姜採傳採杖

已死第垓口潮灌之乃蘇盡力營護後聞鄉邑

破父殉難一門死者二十餘人垓請代兄繫獄

釋採歸葬不許即日奔喪奉母南走蘇州 又

垓為行人見署中題名碑崔呈秀阮大鍼與魏

大中並列立拜疏請去二人名及大鍼得志滋

欲殺垓甚垓變姓名逃之甯波國亡乃解先生有姜

如須從越中 王士正感舊集小傳崇禎壬午

寄詩次韻 採擢禮科給事中五月中條上三十疏以言事

觸首輔怒與行人司副熊開元同下北鎮撫司

獄備極考掠幾死者數矣甲申正月謫戍宣州

衛聞京師陷思陵狗社稷痛哭而南之戍所未

至以金陵赦留吳門不肯歸以馬阮用事避地

徽州祝髮黃山自號敬亭山人戊子奉母歸萊

陽山東巡撫重其名遣使招之先生故墜馬以



折股給使者而夜馳還江南自號宣州老兵欲

結廬敬亭末果病亟遺命葬宣城戍所口吟易

箏歌一章以卒 盛敬 成仁譜崇禎癸未 大

兵入關山東雲擾萊陽諸生姜瀉里字爾岷偕

其季子坡及工部侍郎宋玖玖宗人吏部稽勛

司郎中應亨俱以罷任家居經畫守禦兵薄城

下坡發一砲中其帥首少却亡何夜襲城兩家

皆驅家僮巷戰刃中瀉里背見殺坡抱父屍大

罵兵鬻之執玖應亨相對拷掠不屈死 按瀉里

左懋第 充通問使有下相極樂庵讀同年北使時

詩卷 明史左懋第傳懋第初授韓城知縣有異

政考選戶科給事中福王立為應天巡撫甲申

大學士高宏圖議遣使通好於我而難其人懋

第請行八月渡淮十月朔次張家灣止許百人

入都懋第縗服以往館於鴻臚寺以不得赴梓

宮即於館所遙祭是月二十八日遣還尋自滄

洲追還改館太醫院 葛芝 臥龍山人集侍郎

奉使在北羈太醫院也部曲有盜餉潛通者侍



郎怒杖殺之其黨因告侍郎有異圖攝政王陳  
兵入院令曰薙頭者生不薙者死侍郎叱曰頭  
可去髮不可去同行數十人不屈者參贊兵部  
陳用極游擊王一斌都司張良佐王廷佐劉統  
五人而已因趣下刑部銀鎗數重七日不動遂  
執以如王所王愈欲降之則令侍郎之兄道意  
不得因請死王猶豫未決侍郎奮曰男兒死耳  
何疑爲拽出順城門將就縛飛騎至日降者王  
矣侍郎曰寧爲上國鬼不願爾封王也六人以  
次受戮用極與侍郎屍直立不仆忽驚風四起  
斷蓬飛入天際觀者爲之流涕罷市

二年乙酉三十七歲

南京召拜少詹事

二月

王師南下揚州史

可法

嬰城固守攻益

急

可法

十餘疏告急宏光以演劇不省援兵不至

刺血作書別其母妻

王師以飛礮擊城西南

隅陷

可法

死之有揚州詩

五月初九日

王師渡江福王

由崧

奔太平南



都亡 褚人獲 堅瓠集乙酉五月王師下江南吾

蘇帖然順從六月十三日忽有湖賊揭竿殺安

撫黃家真城中鼎沸賴大兵繼至得甯

劉澤清 降我 朝惡其反覆磔誅之有臨淮老

妓行 王士正 南征紀畧淮安頗稱鞏固甲申五

月澤清實來盤踞與田仰日肆歡飲 大兵南

下有問其如何禦者曰吾擁立福王以來供我

休息八月大興土木造室宇極其壯麗僭擬王

居休息淮上 觚賸澤清建閩淮陰與屯置權

富亞鄒塢而漁色不已天旅南下托以左兵犯

順率旅勤王撤戍離汎大掠南行遇王師於蕪

湖謀入海不得倉猝迎降

鄭芝龍 黃道周 等奉唐王聿鍵 稱監國六月自立

於福州號隆武 楊文驄 之閩有送友人從軍閩

中讀友人舊題走馬詩於郵壁漫次其韻 成仁

譜楊文驄字龍友貴州貴陽縣人崇禎辛未進

士以職方郎中監鎮江軍乙酉夏鎮江潰六月

安撫黃家真至蘇州文驄結陳情等攻殺之尋



入浙至閩拜兵部侍郎丙戌福州陷率川兵搏  
戰不克死

九月執由崧以歸於京師

先生應南京詹事之召甫兩月奕琛寅緣馬士英

復柄用修舊卻先逮吳御史适次擬先生先生知

事不可爲又與馬阮不合乃謝歸 明史奸臣傳

朝政濁亂賄賂公行四方警報狎至士英身掌

中樞一無籌畫日以鋤正人引兇黨爲務時有

狂僧大悲出語不類爲總督京營戎政趙之龍

所捕大鍼欲假以誅東林及素不合者因造十

八羅漢五十三參之日書史可法高宏圖姜曰

廣等姓名內大悲袖中海內人望無不備列獄

詞詭秘朝士皆自危而士英不欲興大獄乃止

夏允彝幸存錄馬士英入政府方快於逐姜

劉而用阮大鍼不復顧大柄之委去也大鍼一

出凡海內人望無不羅織巧詆貪夫壬人無不

湔洗拔用 先生冒辟疆五十壽序往者天下

多故江左尙晏然一時高才子第才地自許者



相遇於南中刻壇墀立名氏陽羨陳定生歸德  
侯朝宗與辟疆爲三人皆貴公子 又有皖人  
者流寓南中故奄黨也通賓客畜聲伎欲以氣  
力傾東南申酉之亂彼以攀附驟枋用興大獄  
以修舊郤定生爲所得幾填牢戶朝宗遁之故  
鄣山中南中人多爲辟疆耳目者跳而免尋以  
大亂奉其父憲副嵩少公歸隱如皋之水繪園  
誓志不出 先生吳母徐太夫人壽序當幼洪  
爲給諫余亦官南中以母老歸養請急東還聞  
幼洪之及也余自知不免雖然不敢以告吾母  
也無何江南大亂余奉母奔竄山中幼洪亦自  
獄所脫歸母子相見倉皇避兵皆懂而後免今  
太夫人康彊壽考諸子拜堂下進七十之觴而  
吾母亦健飯無恙兩家母子同以危苦得全此  
非天爲之耶

五月十七日州役皂隸輿廝等毆張南郭以積米  
未明爲詞劉河兵以數月乏糧擁至城勢張甚十  
九日滿城民夜皆聞鬼哭二十日士民訛言



大兵已至蘇州居民驚徙城市一空知州朱喬秀

吝而懦卒當時危惟擁貲闔門為走計六月初二

日盜庫帑逸初四日州亂焚搶蜂起先生避亂礬

清湖有礬清湖讀史雜感避亂詩思義朱昭芭

明鑄小山雜著乙酉閏六月一日夜將半訛言

忽起傳有寇警余披衣起露立庭中見天上小

星散落如雪洪範曰庶民惟星其隕如星乎十

六日望夜月食之既眾星流移縱橫絡繹各有

芒角占曰百姓流徙之象吳人輕名節而重毫

髮始則望風納欵繼乃愛惜顛毛遂各稱兵旅

拒崑山咫尺音問不通鄉城唇齒辨髮相戮枯

守城中正如坐井七月初四日屠嘉定初六日

屠崑山十二日屠常熟吳郡縣七州一崇明懸

處海外六邑五受傷夷惟一州為魯靈光之獨

存自雜弁恣意淫刑悍卒踴躍奪劫鄉城哽咽

互召敵仇譬之蟹然去其郭索之物惟餘頑然

一腹究復何濟七月初四日屠嘉定左通政侯

峒曾死之子元演元潔從死觀政進士黃滄耀



自縊於真濟寺第淵耀從死孝廉張錫眉縊於  
文廟學正龔用圓投井死初六日屠崑山原任  
總兵王南陽貢生朱集璜死之孝廉徐開元妻  
自縊長子次子不忍其母痛哭罵軍大怒縛置  
庭柱亂鏃射殺二子善屬文有美才崑山被屠  
者幾及八萬人俘婦女無算其軍士大約黃靖  
南降卒也淫殺十倍北軍十二月屠常熟是日  
前荆兵以義陽王爲名需索大戶士女逃竄城  
郭爲空以故軍至無大獲所屠者單戶而已三

縣合計所屠之戶不下一二十萬人凡厚貲強有  
力者先逃荒野遇害間有一二大率中人下戶  
居多語云千金之子不死於市信哉八月初二  
日李成棟統軍屠太倉各鎮李成棟移師至松  
江府松江水師敗北提督京口水營總兵王蜚  
吳淞總兵吳志葵被擒王蜚死之破府城屠四  
五萬人俘婦女畧同吳郡吏部考功司主事夏  
允彝沉河死守金山衛指揮侯懷玉死之

六月

大兵入浙有堇山兒詩

楊

陸榮

三藩



紀事本末乙酉官兵既入浙縱肆淫畧總鎮聞  
梟示十數人令搜各船所掠婦女給還本夫兵  
士畏法遂以所掠沈之江中 又乙酉六月我  
貝勒留兵二千駐吳閫大軍悉趨杭州掠嘉興  
而過時潞王常洵在杭撫按請命奉書迎降而  
嘉興士紳屠象美等復集兵據城守大兵還攻  
半月而破

閏六月祖母湯太淑人卒

三年丙戌三十八歲

瞿式耜等以桂王由榔監國於肇慶號永歷

事衍自蜀中徒跣逃歸有哭志衍詩

秋王煙客時敏治西田於歸涇之上去城西十有

二里是為十四都構農慶堂稻香菴霞外閣錦鏡

亭西廬語稼軒逢渠處巢安等室約張南垣屢山

種樹錢虞山作記先生為作歸村躬耕記

琵琶行 西田詩 和王太常西田襍興

福建道監察御史贈太僕寺卿謚忠毅李公神

道碑銘



四年丁亥二十九歲

正月 大兵克肇慶桂王奔桂林尋奔全州以

式耜 留守桂林

元配郁淑人卒

楊繼生任太倉學正有閩州行贈楊學博爾緒

顧昂齋 壬夏雜抄楊先生秉鐸吾婁妻女

在蜀遭亂已無可奈何矣會吾婁盛泰昭釋禍  
秦之畧陽合楊以杯酒餞之曰倘至彼中得吾  
家消息片鴻寸鯉勿靳也盛赴任一載偶以事

出見婦人負血書匍匐道左物色之卽楊內閩  
也乃假以一椽飛書廣文婦嚙一指以血作字  
并斷指裹來楊得之慟卽以二百金授使俾就  
舟東下會南宮期近楊束裝且北至京口有北  
舟歛南偶觸詢之則楊夫人舟自陝來也相別  
十餘年流落萬死天作之合異哉方出門時女  
猶襁褓今已覓婿同來如一家

游越有謁范少伯祠登數峯閣禮浙中死事六君  
子鴛湖曲鴛湖感舊



王煙客招徃西田賞菊有詩

吳梅村先生年譜卷二終

吳梅村先生年譜卷二

五年戊子四十歲

七月同年楊鳧岫卒先是京師陷鳧岫投愛女於井趣妻妾縊死已則仰藥自殺爲防守者所覺水灌之大吐復活夫人孔氏懸絕甦乃棄家避兵武塘復徙丹陽金沙終歸毘陵鬱鬱不得志以死有左諭德濟甯楊公墓誌銘

八月築舊學庵於梅村西偏先生自爲記

按先生所居梅村舊爲王士騏賁園稱莘莊在太



倉衛東中有樂志堂梅花庵交蘆菴嬌雪樓鹿樵

溪舍禮亭蒼溪亭諸勝

思義攷先方伯松霞公日記甲申正月晤張南垣於

吳駿公之居梅村當時由西間所購

後東皋草堂歌 先生詩話稼軒由進士爲兵

科給事中好直諫爲權相所訐罷歸築室於

虞山之下曰東皋極游觀之勝酷嗜石田翁

畫購得數百卷爲耕石齋藏之未幾里中兒

飛文誣染逮就獄余時在京師所謂東皋草

堂歌者贈稼軒於請室也後數年余再至東

皋稼軒倡義粵西其子伯升門戶是懼故山

別墅皆荒蕪斥賣無復向者之觀余爲作後

東皋草堂歌蓋傷之也又二年知以相國畱

守桂林城陷不屈與張別山俱死

六年己丑四十一歲

夏願雲師從靈隱來止城西太平菴別先生將遠

游廬嶽且期以出世先生作詩贈之 婁東耆舊

傳王瀚字原達受業於張采爲諸生有名國變

爲僧號晦山大師名戒顯字願雲庚寅夏入廬



山遂主席江右瀚雖入空門悲憤激烈曾檄討  
從賊諸臣云春夜宴梨園不思凝碧池頭之泣  
端陽觀競渡誰弔汨羅江上之魂讀者俱爲扼  
腕 焚餘補筆原達性好佛崇禎甲申之變作  
詩謝文廟云忝列諸生踐極年義應君父死生  
連薄言草莽無官責敢卸衣冠哭聖前讀罷捲  
堂羞國士身同左袒幸敷天孤踪願謝宮牆籛  
甘作山農種石田素心多載想盧能獨係高堂  
久未曾國事一朝論鼎沸浮名何惜付層冰聊  
將毀服存吾義從此棲禪學老僧拭取青山無  
累眼好清世事理禪燈遂入山爲僧名戒顯乙  
酉六月州宦陸遜之自淮歸云淮陽自有德宗  
上人知未來事陸以太倉問之德宗以州有再  
來人王和尚庇過再不犯兵革蓋指瀚也州竟  
不被慘禍云 按先生後有得廬山願雲師  
書喜願雲師從廬山歸諸詩

黃陶菴文集序

興福寺鐵爐銘

鴻臚寺序

班封兵部武選司主事丹陽荆公墓誌銘

七年庚寅四十二歲



十一月

大兵入桂林桂王奔臨桂伯瞿

式耜

總督張

同做

俱死

先生詩話稼軒臨難遺表曰

庚寅十一月初五日聞警開國公趙印選移營

先去衛國公胡一青寧遠伯王永祚綏寧伯蒲

纓武陵侯楊國棟寧武伯馬養麟盡室而行惟

督臣張同做從江東泗水過江相期共死其赴

義則閏十一月之十七日也纍囚一月兩人從

容唱和稼軒得詩八首曰二祖江山人盡擲四

年精血我偏傷又曰願作須臾階下鬼何妨慷

慨殿中狂其末章曰年逾六十復奚求多難頻

經渾不愁劫運千年彈指到綱常萬古一身留

欲堅道力憑魔力何事俘囚學楚囚了却人間

生死業黃冠莫擬故鄉游別山和章有曰稜稜

瘦骨不成眠祖德君恩四十年腰膝尙存堪作

鬼死生有數肯呼天又曰白刃臨頭惟一笑青

天在上任人狂又曰亡家骨肉皆冤鬼多難師

生共哭聲又曰此地骨原堪朽腐他時魂不待

招尋二公死有舊給事中後出家號性因者收



其骨義士楊碩父藏其稿稼軒孫文昌間關歸  
以其詩與表刻之吳中爲浩氣吟云別山死事  
最烈其未死也受拷掠兩臂俱折目睛出語不  
爲撓稼軒有初六日紀事一詩曰文山當日猶  
長揖堪笑狂生禮太疎別山和曰臂先頭斷生  
堪賤身爲城亡計豈疎銜木焉知舌在否傷睛  
因笑眼多餘此其被刑時事也稼軒以義命自  
處從容整暇自警詩曰死豈求名地吾當立命  
觀又自艾詩曰七尺不隨城共殉羞顏何以見  
中湘蓋指何公騰蛟以殉難封中湘王也若兩  
公者真可謂殺身成仁者矣

赴十郡大社

毛

奇齡

駱明府墓志駱姓諱復旦

字叔夜山陰人嘗同會稽姜承烈徐允定蕭山  
毛牲赴十郡大社連舟數百艘集於嘉興南湖  
太倉吳偉業長洲宋德宜寶穎吳縣沈世英彭  
瓏尤侗華亭徐致遠吳江計東宜興黃永鄒祇  
謨無錫顧宸崑山徐乾學嘉興朱茂暉彝尊嘉  
善曹爾堪德清章金牧金范杭州陸圻越三日



乃定交去

八月大風海溢有詩

得龔芝麓

鼎孳書  
書載先生詩話

至海虞有琴河感舊聽女道士卞玉京彈琴歌宴  
孫孝若山樓賦贈諸詩

先生詩話卞玉京字雲裝白門人善畫蘭能書  
好作小詩余詩云緣知薄倖逢應恨恰便多情  
喚却羞此當日情景實語也又過三月爲辛卯  
初春乃得扁舟見訪共載橫塘始將前四詩書  
以贈之

附虞山蒙叟讀梅村豔體詩有感書後四首并

序余觀楊孟載論李義山無題以爲音韻清婉  
雖極濃麗皆托於臣不忘君之意因以深悟風  
人之旨若韓致光遭唐末造流離閩越縱浪香  
奩蓋亦起興比物申寫託寄非猶夫小夫浪子  
沈湎流連之云也頃讀梅村豔體詩見其聲律  
妍秀風懷愴惻於歌禾賦麥之時爲題柳看桃  
之作旁皇吟賞竊有義山致光之遺憾焉兩窗



無聊援筆屬和秋菴寒蟬吟歎啾嘶豈堪與聞  
關上下之音希風說響乎河上之歌聽者將同  
病相矜抑或以為同牀各寤羶爾一笑也時庚  
寅元冥之小月二十有五日上林珠樹集啼鳥  
阿閣斜陽下碧梧博局不成輸白帝聘錢無籍  
貫黃姑投壺玉女知天笑竊藥姮娥爲月孤淒  
斷禁垣芳草地滴殘清淚到靡蕪靈璫森沈宮  
扇迴屬車轆轤殷輕雷江長海濶欺魚素地老  
天荒信鳩媒裏上唾看成紺碧懷中泣忍化瓊  
瑰可憐銀燭風前淚畱取胡僧認劫灰搥鼓吹  
簫罷後庭書帷別殿冷流螢宮衣蛺蝶晨風舉  
畫帳梅花夜月停銜璧金釭憐旖旎翻階紅藥  
笑娉婷水天閒話天家事傳與人間總淚零銀  
漢依然界玉清竹宮香蕙露盤傾石碑銜口誰  
能語棋局中心自不平禊日更衣成故事秋風  
紈扇憶前生寒窗擁髻悲啼夜暮雨殘燈識此  
情

嘉議大夫按察司使江公墓誌銘 贈李峩居



御史

八年辛卯四十三歲

巨寇劉

文秀

等踞滇黔吳

三桂

握重兵屯保甯久

無功四川巡撫郝

浴

効其縱兵剽掠包藏異心未

幾東西川俱陷

三桂

棄保甯退走綿州

浴

聞警一

晝夜七馳檄邀

三桂

還賊薄保甯勢張甚

浴

以忠

義激發將士與賊戰大破之即密陳

三桂

跋扈狀

有雜感詩

元旦試筆

梅花菴同林若撫話雨聯句

德藻稿序

九年壬辰四十四歲

館嘉興之萬壽宮輯綏寇紀畧

欽定四庫全書總目提要綏寇紀畧十二卷

國朝吳

偉業撰偉業字駿公號梅村太倉人崇禎辛未

進士授翰林院編修入

國朝官至國子監祭

酒是編專紀崇禎時流寇迄於明亡分爲十二

篇曰澠池渡曰車箱困曰真甯恨曰朱陽潰曰

黑水擒曰穀城變曰開縣敗曰汴渠墊曰通城



擊曰鹽亭誅曰九江哀曰虞淵沈每篇後加以  
論斷其虞淵沈一篇皆紀明末災異與篇名不  
相應考朱彝尊曝書亭集有此書跋云梅村以  
順治壬辰舍館嘉興之萬壽宮輯綏寇紀畧久  
之其鄉人發雕是編僅十二卷而止虞淵沈中  
下二卷未付棗木傳刻明史開局求天下野史  
盡上史館於是先生足本出予鈔入百六叢書  
歸田之後爲友人借失云云意者明末降闖勸  
進諸臣子孫尙存故當時諱而不出與此本爲  
康熙甲寅鄒式金所刻在未開史局之前故亦  
闕虞淵沈中下二卷彝尊百六叢書爲人借失  
者雖稱後十八年從吳興書賈購得今亦不可  
復見此二卷遂佚之矣彝尊又稱其以三字標  
題仿蘇鶚杜陽雜編何光遠鑑戒錄之例考文  
章全以三字標題始於繆襲魏鏡歌詞鶚光遠  
遂沿以著書偉業敘述時事乃用此例頗不免  
小說纖仄之體其回護楊嗣昌左良玉亦涉恩  
怨之私未爲公論然紀事尙頗近實彝尊所謂



聞之於朝雖不及見者之確切而終勝草野傳聞可資國史之采輯亦公論也

接近有虞山張氏刻本  
虞淵沈中下二卷全

先生所著有春秋地理志春秋氏族志綏靖紀聞復社紀事秣陵春樂府梅村詩話鹿樵紀聞

諸書

又有臨春閣通  
天臺兩種樂府

附徐鉉

詞苑叢談吳祭酒作秣陵春一名雙影

記嘗寒夜命小鬟歌演自賦金人捧露盤一詩

黃東崖所謂法曲淒涼者正謂此詞也祭酒又

自題一律云詞客哀吟石子岡鷓鴣清怨月如

霜西宮舊事餘殘夢南內新詩總斷腸漫濕青

衫陪白傅好吹玉笛問甯王重翻天寶梨園曲

減字偷聲柳七郎

按詩集中逸又考先生寄房  
師周芮公詩自注云晉江黃

東崖先生和予此詩中一聯曰徵書鄭重眠  
餐損法曲淒涼涕淚橫知己之言讀之感嘆

唐

孫華

讀鹿樵紀聞有感一旅誰知扼紫荆蝟

蟾聒耳正分爭腹書競伏狐鳴火手蔗頻驚鶴

唳兵直待臨危思翦牧可應先事戮韓彭石頭

袁粲真堪惜自壞邊關萬里城

指東莞  
督師



哭朱昭芭 明鎬 有朱昭芭墓誌銘

與蒼公會 先生詩話蒼雪師雲南人與維揚沈

如師生同年月日相去萬里而法門兄弟氣誼

最得蒼住中峯沈住華山人以此無着天親焉

蒼公年老有肺疾然好談詩以壬辰臘月過草

堂謂余曰今世狐禪盛行一大藏教將墜於地

矣且無論義學即求一詩人不可復得迺幸與

子遇我襍被來不曾攜詩卷當為子誦之是夜

風雨大作師語音愴重撼動四壁痰動喉間略

略有聲已呼茶復話不為倦漏下三鼓得數十

篇視階下雪深三尺矣當其得意軒眉抵掌慷

慨擊案自謂於此證入不二法門禪譏詩學總

一參悟其詩之蒼深清老沉着痛快當為詩中

第一不徒僧中第一也師和余西田賞菊詩有

獨擅秋容晚節全全字落韻和者甚多無出師

上 王士正 漁洋詩話近日釋子詩當以滇南

讀徹蒼雪為第一如一夜花開湖上路半春家

在雪中山亂流落葉聲兼下聽徹寒扉不上關



皆警句也

送林衡者

佳璣

歸閩有送林衡者還閩序并詩

先生詩話衡者少游黃忠烈之門以壬辰二月  
來婁東所著詩文詞數十卷詩蒼深秀渾古文  
雅健有法其行也余贈以詩有五月關山樹影  
圓送君吹笛柳陰船之句已而道阻再游吾州  
則秋深木落鄉關烽火南望思親旅懷悲詫有  
聽鐘鳴悲落葉之風焉

得侯朝宗

方域

書載壯  
悔堂集

先生懷古兼弔侯朝

宗詩死生總負侯羸諾欲滴椒漿淚滿尊

自注  
云朝

宗貽書約終隱不出余爲  
世所逼有負夙諾故及之



吳梅村先生年譜卷三終

吳梅村先生年譜卷四

十年癸巳四十五歲

春禊飲社集虎邱

程穆衡

先生詩箋癸巳春社

九郡人士至者幾千人第一日慎交社爲主慎  
交社三宋爲主右之德宜疇三德宏旣庭實穎  
佐之者尤展成侗彭雲客瓏也次一日同聲社  
爲主同聲社主之者張素文在茲佐之者趙明  
遠炳沈韓倬世奕錢宮聲仲諧王其倬長發太  
倉如王維夏吳郁計登禾周子俶肇則聯絡兩



社者凡以繼張西銘虎邱大會 壬夏襍抄癸  
巳春同聲慎交兩社各治具虎阜申訂九郡同  
人至者五百人先一日慎交爲主次日同聲爲  
主 又會日以大船廿餘橫巨中流每舟置數  
十席中列優倡明燭如繁星伶人數部聲歌競  
發達旦而止散時如奔雷瀉泉遠望山上似天  
際明星晶瑩圍繞諸君各誓於關帝前示彼此  
不相侵畔 王隨菴撰自訂年譜十年上巳吳  
中兩社並興慎交則廣平兄弟執牛耳同聲則

素文韓倬宮聲諸公爲之領袖大會於虎邱奉  
梅村先生爲宗主梅翁賦禊飲社集四首同人  
傳誦次日復有兩社合盟之舉山塘畫舫鱗集  
冠蓋如雲亦一時盛舉拔其尤者集半塘寺訂  
盟四月復會於鴛湖從中傳達者研德子俶兩  
人專爲和合之局是秋九月梅翁應召入都實  
非本願而士論多竊議之未能諒其心也

九月應 召入都授秘書院侍講奉 敕纂修孝  
經演義尋升國子監祭酒時先生杜門不通請謁



當時有疑其獨高節全名者會 詔舉遺佚薦剡

交上有司敦逼先生控辭再四二親流涕辦嚴攝

使就道難傷老人意乃扶病出山

按墓表溧陽海甯兩陳相國共

力薦先生州縣志皆載

有投贈督府馬公自嘆江

總督馬國柱疏薦先生

樓別孚令弟時孚令送先生北行至鎮江賦別而作

登上方橋有感

鍾山臺城國學觀象臺雞鳴寺功臣廟元武湖秣

陵口號遇南廂園叟感賦八十韻淮陰有感將至

京師寄當事諸老高郵道中途中遇雪卽事言懷

臨清大雪阻雪諸詩

胡彥遠

介

送吳梅村被徵入都海外黃冠舊有

期難教遺老散清時身隨杞宋畱文獻代闕商

周重鼎彝滿地江湖傷白髮極天兵甲憶烏皮

重來簪筆承明殿記得揮豪出每遲幕府徵書

日夜催宮開碣石待君來歸心更度桑乾水伏

櫪重登郭隗臺花萼春迴新侍從風雲氣隱舊

蓬萊暮年詩賦江關重輸却城南十里梅一樽

兩雪坐冥濛人在汪洋千頃中老驥猶傳空冀

北春鴻那得久江東榛苓過眼成虛谷禾黍關



心拜故宮我亦吹簫向燕市從今敢自惜途窮  
碧海黃塵事有無此來風雪滿燕都遺京節度  
新推轂盛世朝廷倍重儒花暗鳳池思劍珮春  
深虎觀夢江湖悲歌吾道非全泯坐有荆高舊  
酒徒

十一年甲午四十六歲

官京師有病中別孚令弟

時孚令省先生於京及  
師南歸言別而作

再寄三弟詩

前詩意有未盡故出京後再寄  
之掛冠之志不覺情見乎詞

送穆苑先南還

壽總憲龔公芝麓

送湘陰

沈旭輪謫判深州

送天台何石湖之官臨晉

兼簡蒲州道嚴方公

送永城吳令之任 送

李書雲蔡閩培典試西川

送山東耿中丞青

藜 送顧舊來典試東粵

十二年乙未四十七歲

送隴右道吳贊皇之任

十三年丙申四十八歲

春

上駐蹕南苑閱武行蒐禮召廷臣恭視賜宴行宮先生



賦五七言律詩五七言絕句每體一首應制

聖駕幸南海子遇雪大獵先生恭紀七律一首

午日 賜宴瀛臺龍舟

海寇犯鎮江有江上詩

海寧陳相國謫戍遼陽有贈遼左故人詩

哭蒼雪法師有詩

宛陵施愚山

閩章

提學山東送之以詩

施

閩章

夢愚堂銘施子返自粵西載懼憂感除服北征

宿於青州之官舍庭月皎然酒酣就睡若有見

焉頽然而長黝然而黑長袖青衣袒胸跣足持

半刺署愚山道人四字時順治乙未三月之望

日也至京師以告侍讀學士龍眠方先生答曰

嘻殆子之前身也因呼余曰愚山子迄明年拜

命督山東學抵青州駐節於斯開帙視郡志地

故有愚公谷乃失笑曰向所夢者其斯人耶

馬

逢知

爲松江提督有茸城行客談雲間帥坐中

事詩

董

含

三岡識畧馬逢知初名進寶起家羣

盜由浙移鎮雲間貪橫僭侈百姓殷實者械至



倒懸之以醋灌其鼻人不堪無不罄其所有死者無算復廣佔民廬縱兵四出劫掠時海寇未靖逢知密使往來江上之變先期約降要封王爵反形大露事定科臣成公肇毅特疏糾之朝廷恐生他變温旨徵入繫獄妻女發配象奴未幾與二子伏法東市當逢知之入覲也珍寶二十餘船金銀數百萬他物不可勝紀綿亘百里及死無一存者人皆快之

約齋公舉鄉飲大賓

州守三韓白公

登明

選邑

中耆碩七人賓於庠備養老之禮首前浙江布

政使松霞顧公

燕詒

時年七十四歲次約齋公

時年七十三歲次前太常寺卿煙客王公

時敏

次前嘉湖兵備道魯岡吳公

克孝

次同官縣知

縣梅梁曹公

有武

次前河間府知府約菴凌公

必正

次前新都縣知縣攝六黃公

翼聖

以次爲

序爲婁東七老他爵位高而名德弗逮者不與焉 白公尊禮婁東七老啟嘗稽養老之典肇自虞庠介壽之詩奏於幽雅蓋敬老近父國雍



有醬醕之文而序賓以賢閭里成仁讓之化然而世多涼行商芝徒翼漢儲時際代遷渭璜疇襄周鼎求其鴻冥儀世一時星聚太邱鮐背維祺百世風師大雅蓋其鮮矣睽茲婁東三吳之名州而忠哲之淵藪也鸞翔鳳舉仕版蔚爲聲施豹隱鱗潛川林毓多大老方伯顧公名著价藩心懷肥遯鯉庭之昌後叶其作求塵尾之宗雷讓其領袖封君吳公經啟振麟情怡盟鷺旣儀一而心結更抱冲而揚和太常王公世襲簪纓心棲元淡齊家飭肅雍之範宜爾多賢禮人被光霽之風羣推長者憲副吳公澤咏召棠清甘原爍朱絃玉尺禔躬無愧直方丹篆青編好學尙勤切琢邑尹曹公花封解綬門高五柳之風蔗境垂簾字藹三芝之秀憲副凌公榮謝桂林性耽松壑徜徉自得不緇城市之塵翰墨競珍獨步風華之蘊州牧黃公明月入懷清風振世樂推爲善踵太邱之遺徽心徹禪宗埽辟支之小乘此七老者咸先世之逸民海邦之耆碩



也雖行不同軌而齒皆遐齡久心寫於式閭茲  
身親夫授几十月初吉鄉飲屆期敘請諸老用  
光大典初歌鹿鳴之詩志乞言也嗣歌南山之  
詩祝壽考也既歌淇澳之詩揚進德也考鐘伐  
鼓圍視聽於橋門崇齒尙賢隆賓僎於杖履大  
禮既成列耆載宴瞻斗杓之有七熠熠台光稱  
達尊之有三巍巍嶽望年日耄而德日劭國有  
老成之型懦可立而頑可廉風登仁壽之域將  
見香山之九老不獨擅美千秋而洛社之羣英  
亦可匹芳百禩矣此固一鄉之盛亦有司之光  
也謹將七老姓氏齒爵錄於左方以詔來茲焉  
思義先方伯松霞公日記云十月朔日乙亥大  
霽大暖如暮春赴州守鄉飲之席圍橋門而觀  
聽者萬人共詫以爲盛舉豈知吾胸中黍離麥  
秀之感也

嗣母張太孺人卒於家

陳廷敬先生墓表奉嗣

母之喪南還

上親賜丸藥撫慰甚至

王崇

簡吳母張太孺人墓誌銘先生始生時朱太孺



人尙育三歲子太孺人念其勞瘁從襁褓中乳  
字先生及夫顧復醫禱恩義真切此太孺人每  
以無忘撫育恩詔先生也況太孺人之歸文玉  
公也訓有錢孺人未周歲之遺女以至嫁而歿  
勤劬周恤人不以爲繼母也殆其性之者與按  
太孺人世爲婁東望族明經張柏菴公其父也  
迨歸文玉公爲繼室文玉公入繼大宗爲玉田  
公後歲時思慕孝祀不衰與朱太孺人事其姑  
四十年將承恐後而妯娌之間和藹相終始雖  
雖如也當先生趨 召太孺人固康彊無恙也  
而眷戀若永訣屬先生異日無忘我夫婦之事  
嗣父母者嗚呼此先生之所以念之而猶悲也  
太孺人之生明萬歷辛巳年六月二十二日而  
其卒也順治丙申年十月初十日享年七十有  
六嗣子偉業卽梅村先生也

送何蓉菴出守贛州

送何省齋

送舊總憲

龔孝升以上林苑監出使山東

送程太史翼

蒼謫姑蘇學博

送郭宮贊次菴謫官山西



送曹秋岳以少司農遷廣東左轄 送王藉茅

學士按察浙江 送當湖馬觀揚備兵岢嵐

送王孝源備兵山西

十四年丁酉四十九歲

二月歸里 王隨菴自訂年譜十四年春吳梅翁

以大司成告歸 先生剡城曉發詩他鄉已過

故鄉遠屈指歸期二月頭

州守三韓白公 登明 濬劉家河先生為記 按記集中逸見

縣志 有答撫臺開劉河書 顧 士璉 婁江志州守白

公督工河上單騎巡行一日值天晚欲借宿民

家思民間俗忌不利官府到家徘徊道傍而民

亦閉戶不納適金粟菴僧來迎乃止於菴明日

以白金一兩酬僧於是民皆願公來宿而公以

布帳隨身竟露栖矣

張敕菴黃門五十壽序 聖恩寺藏經閣記

十五年戊戌五十歲

科場事發吳漢槎 兆騫 孫赤崖 賜 陸子元 慶增 俱

貸死戍邊有悲歌贈吳季子贈陸生吾谷行 程



穆衡

顰悅卮談同時如吳江吳漢槎兆騫常熟

孫赤崖暘長洲潘逸民隱如桐城方與三育盛  
皆有高才盛名同以科場事貸死戍邊子元以  
機雲家世與彝仲大樽爲輩行輒軻三十年至  
垂老乃博一舉復遭誣以白首禦窮邊而死一  
妾挈幼子牽衣袂行路盡爲流涕 汪琬 堯峯  
文鈔壬辰權貴人與考官有隙謀因事中之於  
是科場之議起指摘進士首名程周量經義被  
黜科場之議日以益熾其端發於是科而其禍

及於丁酉士大大糜爛潰裂者殆不可勝言

蔣良騏

東華錄九年三月大學士范文程等言

會試中式第一名舉人程可則文理荒謬首篇  
尤悖戾經註命革中式並治考官罪十四年十  
月同考官李振鄴張我樸舉人田耜鄔作霖科  
臣陸貽吉等俱立斬家產籍沒父母兄弟妻子  
流徙尙陽堡給事中任克溥劾其賄買中式訊  
實故也十五年二月以賄買情弊覆試丁酉科  
順天舉人朱漢雯等內蘇洪濬等八名文理不



通革去舉人三月諭禮部丁酉科中式江南舉

人物議沸騰是以親加覆試今取得吳鳴珂准

同會試中式舉人一體覆試其汪溥勛等七十

四名仍准作舉人史繼佚等十四名罰停會試

二科方域等十四人文理不通着革去舉人十

一月刑部審實江南鄉試作弊奉 旨主考方

猶錢開宗正法同考官葉楚槐等卽處絞

壽房師李太虛先生 房師李太虛先生壽序

白封君六十壽序 贈奉直大夫戶部福建

清吏司員外郎仲常費公墓誌銘 張母潘孺

人暨金孺人墓誌銘 劉母耿淑人墓誌銘

十六年己亥五十一歲

六月鄭成功陷鎮江七月犯江甯復犯崇明

春游石公山 秋遊虞山

少保大學士王文通公神道碑銘 太僕寺少

卿席甯侯墓誌銘 謝天童孝廉墓誌銘

十七年庚子五十二歲

里居以奏銷事議處時邑中如顧伊人滑王惟夏  
吳黃庭表與堅同以奏銷註



誤

堅瓠集江南奏銷之獄起於巡撫朱國治

欲陷考功員外郎顧予咸株連一省人士無脫

者蘇州府志庚子十二月吳縣知縣任唯初

山西石樓人選貢生涖任即逼倉總吳行之私糶漕糧七

百石婪賄虐刑口碑騰刺十八年二月章

皇帝遺詔下府堂哭臨第三日生員倪用賓等

列款具呈巡撫朱國治發蘇松常道王紀即提

吳行之等嚴訊供實覆院諸生發知府余廉徵

羈候府治花亭唯初回縣次日生員金人瑞丁

瀾等哭府學文廟教授程邑申報六案朱始摘

任印着本府看守土地祠唯初逢人說朱撫院

要我銀子故此糶糧朱遂以諸生驚擾哭臨意

在謀叛具疏銜在籍吏部考功員外郎顧予咸

株連之適差滿大臣至江甯審金壇叛招并訊

題覆部議覆准倪用賓沈玘顧偉業薛爾張姚

剛丁瀾金人瑞王重儒八人典刑家產入官妻

孥流徙張韓來獻祺丁觀生朱時若朱章培周

江徐玠葉琪唐堯治馮郵十人本身典刑其顧



予咸會議得疏中有諸生送揭予咸擲地不觀  
之語所擬革職籍沒罪絞奉旨俱免唯初復任  
後因白糧經費遲延部議降調國治復糾其貪  
勘實絞決於省城未幾國治解任

八月至無錫訪同年吳永調

其馴

有有感賦贈詩

哭亡女

亡女權厝志

清涼山讚佛詩

七

夕感事

七夕卽事

送王子惟夏以牽染北

行

十八年辛丑五十三歲

雲南平

康熙元年四月  
由榔死於雲南

有滇池饒吹

本生母朱太淑人卒

文學博歸道病歿於桃源

縣

送張玉甲憲長之官邛雅

康熙元年壬寅五十四歲

巡撫韓公

世琦

請撤蘇州駐防兵

按先生有大中  
丞心康韓公九

月還自淮南  
生日爲壽詩

蘇州府志名宦韓世琦字心康本

蒲州人明大學士熿曾孫世琦隸旗籍爲遼人

康熙元年由順天巡撫移撫江南懲前政之弊



加意拊循日進士民詢以利弊次第舉行崇明  
 瀕海居民遷內地者安輯不合失業所棄界外  
 田三千八百餘頃為奏免額賦萬九千餘石折  
 銀萬六千餘兩蘆課八千餘兩 國初年之江  
 南吳中特駐重兵以防寇盜北來軍士素驕橫  
 為民患至是世琦奏言江南甯謐力請調回及  
 撤回之日慮其擾民與統兵者約令嚴加禁戢  
 躬率文武將吏往來巡視無一人敢干令者三  
 年夏瀕海太倉等州縣颶風大作漂沒民田廬  
 舍萬計親往勘實奏蠲其稅七年吳中大水餓  
 殍載途世琦繪圖入告始得蠲賑嘗疏請減免  
 蘇松浮糧詳田賦類事雖不行民甚德之居八年以  
 各屬逋賦被議去

子曠生

字元朗號西齋康熙戊辰進士由戶部主事遷兵科給事中入直 武英殿充書畫

譜纂修官著有西齋集左司筆記錦溪小集

太倉州志吳駿公偉

業連舉十三女而子曠始生時唐東江孫華為  
 名諸生年已及強立矣赴湯餅宴居上坐駿公  
 戲曰是子當與君為同年唐意拂後戊辰曠舉



禮部唐果同榜

贈蘇郡副守涪陵陳三石 贈松郡司李內江

王擔四 贈彭郡丞益甫 敕贈大中大夫盧

公神道碑銘

二年癸卯五十五歲

本生父約齋公卒 子隣生 字中麗能 詩早卒

白澗沈公 受宏 受詩法於先生 見外高祖白澗詩集自註

僉憲梁公西韓先生墓誌銘

三年甲辰五十六歲

子暄生 字少融增監生薦充 武英殿纂修歷知 壽光壽張縣有政績著花韻軒集退盦詩

集 攷先生三子俱 側室朱安人出

顧西巘侍御招集虎邨有夜游虎邨顧西巘侍御

同沈友聖虎邨卽事西巘顧侍御招同沈山人友

聖虎邨夜集作圖記事因賦長句諸詩

香山白馬寺巨冶禪師教公塔銘 顧母陳孺

人八十壽序

四年乙巳五十七歲

錢臣展五十壽序 監察御史王君慕吉墓誌



銘

五年丙午五十八歲

魯謙菴使君以雲間山人陸天乙所畫虞山圖

索歌成二十七韻 兵科給事中天愚謝公墓

誌銘

六年丁未五十九歲

三月二十四日從山後過湖宿福源精舍 一

十五日借穆苑先孫浣心葉予聞允文游石公

山盤龍石梁寂光歸雲諸勝 游石公歸是夜

驟雨明晨微霽同諸君天王寺看牡丹 沈文

長雨過福源寺

七年戊申六十歲

吳園次綺以書招先生先生之吳興

上巳過吳興家園次太守招飲郡圃之愛山臺

座客十人同修禊事余分韻得苔字 立夏日

陪園次郡伯過孫山人太白亭落成置酒分韻

得人字 贈湖州守家園次五十韻 修孫山

人墓記 雲起樓記 湖州峴山九賢祠碑記



席處士允來墓誌銘 蔣母陳安人墓誌銘

靈隱具德和尚塔銘

編詩文集四十卷成同里周子俶肇王維夏吳許

九日旭顧伊人滄校讐付梓陳確菴為之序

御製題吳梅村集梅村一卷足風流往復搜尋未肯休  
秋水精神香雪句西崑幽思杜陵愁裁成蜀錦應慚麗  
細比春蠶好更抽寒夜短檠相對處幾多詩興為君收  
欽定四庫全書總目提要梅村集四十卷 國朝吳偉  
業撰偉業有綏寇紀畧已著錄此集凡詩十八

卷詩餘二卷文二十卷其少作大抵才華豔發  
吐納風流有藻思綺合清麗芊眠之致及乎遭  
逢喪亂閱歷興亡激楚蒼涼風骨彌為道上莫  
年蕭瑟論者以庾信方之其中歌行一體尤所  
擅長格律本乎四傑而情韻為深敘述類乎香  
山而風華為勝韻協宮商感均頑豔一時尤稱  
絕調其流播詞林仰邀 睿賞非偶然也至  
於以其餘技度曲倚聲亦復接跡屯田嗣音淮  
海王士禎詩稱曰白髮填詞吳祭酒亦非虛美



惟古文每參以儷偶既異齊梁又非唐宋殊乖  
正格黃宗義嘗稱梅村集中張南垣柳敬亭二  
傳張言其藝而合於道柳言其參甯南軍事比  
之魯仲連之排難解紛此等處皆失輕重爲倒  
却文章家架子其糾彈頗當蓋詞人之作散文  
猶道學之作韻語雖強爲學步本質終存焉然  
少陵詩冠千古而無韻之文率不可讀人各有  
能有不能固不必一一求全矣

按先生詩有程穆衡吳詩箋七卷靳榮藩吳  
詩集覽二十卷吳翌鳳吳詩箋注十八卷

八年己酉六十一歲

楚蘄盧

統

爲先生丙子典試所取士來爲蘇松常

鎮參政及門諸子屬序先生詩文集

沈

德潛

書梅村集後蓬萊宮裏舊仙卿自別青

山梅遠行擬作柳陽離別賦江南愁殺庾蘭成

吳

祖修

書梅村詩後夢回龍尾醒猶殘重入

春明興轉闌宣去何能如老鐵放歸未許戴黃  
冠悲歌自覺高官誤讀史應知名士難今日九  
泉逢故友西臺涕淚幾時乾



附

婁東耆舊傳梅村公得瑯琊賁園稱莘莊改

構廓然堂甫竟而卒門人楚人盧紱來為蘇松

巡道升堂公母朱太淑人不時出盧詢之公對

以後樓未建故去內舍甚遙盧即建樓其後翼

然與堂稱斯亦非近今人所能也

思義 攷 王書

城

瑞國 為 士驎

傳云性喜多費興作無虛日然

考是園不為侈廓然堂則其長子慶長瑞庭俗

呼大癡者為之慶長性似父而汰尤甚初廓然

既構矣不當意立命拽毀之再構又然至三始

成有楊某者度其不能繼也乃竊量堂之規模

構一樓於已宅覬王急則購以移焉閱二十餘

年王果敗而楊亦破家是堂及園遂為吳有然

樓猶屬楊也又幾年梅村門生某

或云糧儲 為 道盧紱

買之置堂後果稱無爽造物之幻如是今堂與

樓皆為瓦礫場矣

九年庚戌六十二歲

探梅鄧尉有梅信日雨過鄧尉哭剖石和尚遇大

雪夜宿還元閣詩



京江送遠圖歌 吳郡唐君合葬墓誌銘 太

學張君季繁墓誌銘 封徵仕郎翰林院檢討

端陽孫公暨鄒孺人合葬墓誌銘 錢母譚太

君六十壽序

十年辛亥六十三歲

感舊贈蕭明府

十二月二十四日先生卒門人顧涓撰行狀

先生元旦夢至一公府主者王侯冠服降階迎揖  
出片紙非世間文字不可識謂先生曰此位屬公

矣十一月朔復夢數人來迎先生書期日示之

王士正池北偶談吳駿公辛亥元旦夢上帝召

爲泰山府君是歲病革有絕命詞云忍死偷生  
廿載餘而今罪孽怎消除受恩欠債須填補縱  
比鴻毛也不如時浙西僧水月年百餘歲能前  
知先生病亟始拏舟迎之至則曰公元旦夢告  
之矣何必更問老僧遂卒

先生屬疾時作令書乃自敘事畧曰吾一生遭際  
萬事憂危無一刻不歷艱難無一境不嘗辛苦實



爲天下大苦人吾死後歛以僧裝葬吾於鄧尉靈  
岩相近墓前立一圓石曰詩人吳梅村之墓

先生病中有感詞

調寄賀  
新郎

萬事催華髮論龔生

天年竟天高名難沒吾病難將醫藥治耿耿胸  
中熱血待灑向西風殘月剖却心肝今置地問  
華陀解我腸干結追往事倍淒咽故人慷慨多  
奇節爲當年沈吟不斷草間偷活艾炙眉頭瓜  
噴鼻今日須難訣絕早患苦重來千疊脫屣妻  
孥非易事竟一錢不值何須說人世幾完缺

沈

受宏

白澗集哭梅村師茫茫滄海劫餘身遺

恨心肝抱苦辛自迫三徵蒙 聖代未輕一死

爲衰親南朝宮闕悲瓊樹北極衣冠記紫宸留

得茂陵末命在西山題墓作詩人

四首  
錄一

附脫簡

順治十二年乙未

贈馮訥生進士教授雲中

十五年戊戌

黃觀只五十壽序



十六年己亥

丁石萊七十壽序

十七年庚子

冒辟疆五十壽序

康熙五年丙午

江西巡撫韓公奏議序

九年庚戌

龔芝麓詩序

五十二年癸巳葬蘇州郡治西南二十里西山之麓

澤州陳

廷敬

讓墓表

蘇州府志

國朝祭酒吳偉業墓在靈巖山麓

按墓

在蘇州府吳縣

元墓山之北

袁簡齋太史稱婁東詩人前有弇州後有梅村向

見錢竹汀宮詹讓弇州山人年譜獨梅村先生年

譜闕如

軾

不揣固陋謬為續貂之舉讀先生詩輒

取程迓亭靳介人吳枚菴諸箋註凡有年月可稽

者一一劄記釐次前後復於汎覽之下事涉先生

編年比附自壬辰迄己亥八閱寒暑彙凡十數易



輯爲年譜四卷中有家仁仲參訂處今已墓門宿  
草並爲標明非敢比郭象注莊之例也所恨管窺  
蠡測掛漏尙多舛訛亦不免惟冀博雅君子匡以  
不逮幸甚道光庚子春二月顧師軾識

是書刻以問世三十餘年矣庚申之亂板片盡毀  
近年覓得原本欲謀重刻適先生裔孫子掄茂才  
守元見之謀諸羣從力任剞劂爰共相商權釐訂  
一二付梓光緒二年臘月師軾又識

吳梅村先生年譜卷四終

先祭酒公年譜爲同里顧雪堂先生所編舊板燬於兵  
光緒二年先生屬集資重刊余謀諸昆季謂先公著  
述久已彪炳人間獨年譜流傳尙少先生旣爲先公  
之功臣守元等何敢稍緩梨棗亟授梓人以誌敬佩茲  
擬重爲校印而先生已歸道山十有三年矣點勘之餘  
不能無今昔之感云

光緒二十有三年春正月六世孫守元七世孫詩永謹  
識并校





卷之五

武備二十以三平釋世民六世曆行次出州府得本

木州縣合有七題天

謀重飲效明而宗必曰論以山十首三平次應世

之世明在 善向並除難難難難難難人以

世天曰風雨八門雨千和雨雨雨雨雨雨雨雨

表體一平安公 難難難難難難難難難難難難

表體一平安公 難難難難難難難難難難難難



